

Zeitschrift: Annalas da la Societad Retorumantscha
Herausgeber: Societad Retorumantscha
Band: 56 (1942)

Artikel: Religiun e Pievel : Poesias
Autor: Camathias, Flurin
DOI: <https://doi.org/10.5169/seals-211815>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>

Religiun e Pievel

Poesias fatgas da Flurin Camathias

Igl um della pasch

Faviala della Rezia, pronunziescha
Ensemen cun ils Svizzers in car num,
Fai in tschupi per el e celebrescha
Il promotur de pasch, il niebel um.
El vegn en tut la patria menzionaus,
Igl eremit dil Ranft, frar Nicolaus.

Encunter tschiel alzada ei l'egliada
Digl um dell' oraziun, sco sch'el vesess
La maiestad divina revelada
E pasch celestiala gia gudess:
La vusch de Diu, che plaida plein buontad,
El vul tedlar en la retratgadat. —

Agricolan, schuldau e bab el era,
Mo funs, famiglia ha el bandunau;
El tuorna buca pli tier la tschavera,
El ha vivonda celestial' anflau.
Al Bab en tschiel dil tut el sesurdat,
Ed anfl' en El ruaus, beadadat.

La pintga cella ha savens viseta,
Il fratèr Clau fa bein il mediatuor;
Igl um de pasch po bandischar la greta
Ed urbir o da Diu bein bia favur.
Per sia patria roga 'gl eremit
Ed en grond prighel anfl' el aunc salit.

Discordia ruinonta ditg smanatscha
E fa embrugls els stats confederai;
Il Clau tier Diu stend' ora sia bratscha,
Urbescha pasch a Stans pils deputai;

La radunonza teidla siu cussegl,
E bein sliquiaus en cuort ei il scumbegl.

Serimnan Svizzers uss sper tia fossa,
O survient de Diu glorificau,
Mantegn en pasch, en unitad e possa
La cara patria el present stemprau;
E passa supplicond tiel Tutpussent
Per implorar pil mund megliurament!

Cantada dil Munt s. Gieri

I.

Lein fiasta far en quest revier,
Sur quel regev' in cavalier,
Signur dil segneradi.
Sil Munt sogn Gieri sur nies plaun
Regev' el era sur Ruaun,
Il castellan garmadi.

Ils purs ein stai fetg grittentai,
Avon la tuor ein serimnai
Per schar sentir la torta.
Cheu la signura el prighel grond
Vegn sin feniastira a schmanond
Teil' alvâ sur la porta.

II.

Da cor migeivel e generus,
Carina culs paupers e munglus,
Ell' era adina stada.
Il pievel per ell' ha compassiun,
Fritgeivla ei sia intercessiun,
La supplica vegn tadlada.
La dama vegn ord il casti,
In survient ha sin siu schuî

In sac de gronda peisa. —
 Ils purs gia sminan buca bien
 E vessen de ruclar talien
 Il sac sur greppa teissa.

III.

Il capitani dils purs armai
 A la signura rispunder lai
 Cun biala curtesia:
 «Vus libramein passar pudeis
 Cul pli custeivel, che vus veis,
 Aviarta vegn la via.»

IV.

Cheu il menader di denton
 A la signura: «Mei vinavon!
 Mettei en segirezia
 Vies scazi sco gl' ei concediu;
 La garmaschia fin ha priu
 E nossa ei la fortezia!»

En musica da Hs. Erni.

Puraglia e segneria

Sil crest de larischs en la spess' umbriva
 Stat la miraglia d'in casti curdau.
 El bien temps vegl en legra gastaria
 Cul castellan leu stava signeria,
 Per donn dil pur vivev' en biala stiva;
 En paupra tegia stav' igl um squitschau.

Igl ei midau canzun; oz la puraglia
 Fa fiasta sil pastget giusut gl'uaul;
 Allerta las vischnauncas ein vegnidas,
 Las libertads sin tuttas varts carschidas,
 Ils tschentaners han fiers las tuors en paglia,
 Il liber pur ei s'avanzaus egl ault.

Mo ei la `paupra sort dal mund svanida?
 Ein libertads pertut duvradas bein?
 Ei dat aunc castellans e tirania,
 Il pur trai vi la loscha segneria.
 Cul tgau alzau il pur sil tschiel sefida
 E porscha paun a tuts fideivlamein.

Liungas uiaras

Tgei onns dolorus,
 Tgei mund sanguinus,
 Cons umens curdai en las tiaras!
 Combats senza fin,
 Ils stats en sgurdin,
 Las mars plein ruinas e baras!

Cu leis vus calar,
 Carstgauns de mazzar,
 Cu tuorna la pasch bandischada? —
 Tier Diu returnei,
 Passiuns dumignei,
 Lu croda la spada smanada!

O Diu dil salit,
 Tegn prompts tiu agid:
 Il mund puspei drov' in spindrader;
 Mo Ti pos gidar,
 Sin Tei lein fidar,
 Nies Segner, dils pievels menader!

Ti eis aunc cun nus,
 Affon grazius,
 Naschius quella notg benedida;
 Ti vul nus salvar,
 La pasch pos purtar,
 Sche mo ella vegn encurida.

Caspar Decurtins

† ils 30 de matg 1916

Da Gravas anora sin bia excursiuns
 Ils scazis dil pievel gia miez emblidai:
 Las detgas, novellas e veglias canzuns
 Rimnav' el bugen cun amitgs premurai.
 Raccolta stupenta, biars onns s'engrondida,
 Al pievel surstau dal success ei purschida.

Las forzas fritgeivlas de giuvens students
 Cun fiug el clamava entuorn igl Ischi.
 Per l'ierta grischuna buns novs moviments
 Dal suffel de Trun en carschen ein vegni:
 Romania, tiu num il mistral honorescha,
 Tiu best cun bia roma aunc ussa flurescha.

Cun plaids de vigur en ils gronds parlaments
 Sco svelt cavalier el batta pil ver,
 Pil bien de siu pievel en tuts munglaments,
 Per dar al luvrer, che fa siu duer
 Risguard e giusta, bien dretg, segironza,
 Agid vicerdeivel en dis de munconza.

La patri' helveta sco um nazional
 El ha carezau cun nobels bials duns
 Luvrond e suffrend pil beinstar communal,
 Per l'ierta stimada d'undreivels babuns:
 L'idea romantica vivi adina
 En nossa naziun, la feglietta alpina!

Beinvegni alla viafier Glion – Mustér

Ils 30 de fenadur ed igl 1 d'ost 1912.

Val renana

Sursilvana

Tochen sum pos fiasta far:

Silla strada

Enferrada

A vapur vegn oz il carr.

Vitgs e spundas,
 Vals profundas
 Cun in schul salid' il tren;
 Leventada,
 Spuentada
 Fui l'utschlegli' empau naven.

Las ureglias
 De merveglias,
 Lieurs surstadas, uss gizzeis;
 Tais en tauna
 Umbrivauna,
 Tgei de quei pomai tertgeis?

Muntanialas,
 Sillas palas
 Stei von rusna e tedlei,
 Tgei schuladas
 Tras valladas
 Tgei suns novs leu giu ei quei?

Selvas bialas
 E pardialas,
 Isoladas buca pli,
 Traversadas,
 Visitadas,
 Selegrei uss mintga di!

Sper Sontg' Onna
 Uss sehona
 De bia hosps il bi Ischi;
 Sco sittada
 La tillada
 Va tral cor de la Cadi
 En l'altezia
 Cun franchezza
 Va il tren sur artgs e punts;
 Precipezi
 Plein snuezi
 Ves' il viandont giufuns.

Desertina,
 Buc adina
 Eis ti pli en in desiert;
 Dubla via
 En câ tia
 Al temps niev ti has aviert.

Rein selvadi,
 Sil viadi
 Pos ti buca suenter pli;
 Prescha gronda,
 Oz damonda
 Il progress, engiu, ensi. —

Val grischuna,
 L'ierta buna
 Lai mai mai naven menar,
 Silla strada
 Enferrada
 Lu da cor pos fiasta far!

Al cantadur episcopal Monsignur Georgius Schmid

† 6 de matg 1932

Maria, en tiu meins de matg,
 In cantadur ha priu comiau;
 Ti eras siu pli dulutsch pertratg,
 Tier tej la vusch el ha alzau.
 Pren si el leu tier la vegnida
 Sco in dils tes e drov' urbida!

O mumma, audas las canzuns,
 Ch'il pievel conta vinavon
 En tempels, cun legreivels suns
 Per tei e per tiu car Affon?
 Tiu cantadur la melodia
 Per ti' honor ha mess sin via.

Signura, ti has inspirau
 A tiu survient ils bials pertratgs;
 In bi tschupi tegn preparau
 Per la carezia, per ses fatgs:
 En tiu survetsch pren el, regina,
 E salva el cun tei adina!

Al curtin de sogn Placi

1881—1931

Scolars de Mustér, o vus giuvens e vegls,
 En claustra fageis radunonza:
 La crusch de sogn Placi unescha ses fegls
 Entuorn quell' antica dustonza;
 Sabientscha leusi vus haveis acquistau;
 En veta persuenter da cor engraziau.

Culs paders mussaders, ils benedictins,
 Fa fiasta legreivla la scola:
 Annadas tschunconta suls cudischs latins
 Tarlischa da niev la cazzola;
 Tier buna clamada students ein vegni,
 Cun reha raccolta bein tuts benedi.

La scola claustrala flureschi biars onns
 Sco niebel curtin de sogn Placi,
 Pertgiri il Segner las tuors da tuts donns
 E laschi als paders lur spazi,
 E possien scolars e magisters plantar
 Ventira che po en perpeten cuzzar!

Sur directur G. Fidel de Puoz

1817—1875

Siatontatschun onns gia flurescha
 A Glion la plontaziun:
 L'enfiarla, fleivla all' entschatta,
 Ha ussa extensiun,
 Ha freid e suffels dumignau,
 La veta en combats salvau.

In niebel fegl della Surselva,
 Dad egl e spért bein clar,
 Igl institut sin biala spunda
 Entschiet ha de fundar,
 Purtond quitaus de directur,
 Unfrend leu rauba e lavur.

Agl. Institut de Glion ventira
 Trals Sogns Giusep e Clau!
 Flureschien sias filialas
 Sco stau ditg planisau,
 Sco intendev' igl um de Siat,
 Che en memoria semper stat.

Monsignor Luregn Vincenz

22 de matg 1932

O curia veglia dils Retoromans,
 Fai fiasta, selegra cul niev Monsignor!
 Mirei, vus romontschs e tudestgs e talians,
 El pren uss la canna en maun, il Pastur!
 Giu dalla montogna, si dalla planira,
 Vegni, agurei al bien bab la ventira!

La mumma Margreta cun bia oraziun
 Ha grazia bein gronda pudiu or urbir;
 La mumma Maria al fegl protecziun
 Ha dau giu da tschiel cun favur e surrir.
 Patrums digl uestgiu, o vus Sogns, assistenza
 Purschei, ch'el contonschi merets d'excellenza.

La nav de sogn Pieder en temps burasclus
 Firms umens damonda sper il guvernagl;
 Curascha ei drov' el combat stermentus,
 Ch'ins metschi d'errur, da malura e sbagl:
 Ti meinas tiu Christus en tia barchetta,
 Mo tschenta sil Segner fidonza cumpletta!

Cartents e fideivels en tut igl uestgiu,
 Cun Christus, cul papa vulein nus restar,
 Tuts prighels, combats cun il mund malvugliu
 Pon buca las olmas da Diu separar:
 Fideivels sils cuolms e giu ella planira
 Da cor agurei agl uestg la ventira!

Alla Romania giubilonta

1896—1921

Romania, rimna tes giuvnals
 Dals cuolms ed ord valladas:
 Tarlischan gie tes ideals
 Tras ventgatschun annadas!

La tradiziun ti has salvau;
 Romontschs vegni allerta,
 Han bialas fiastas celebrau
 Cun variaziun perderta.

«Conservativs e productivs!»
 Ei la parola nossa,
 Il spért romontsch, activs e vivs,
 El muossi nova possa!

Bandiera nova sur nos tgaus
 Cun bials maletgs tarlischa:
 Sogn Gieri, da nos vegls undraus,
 'Gl Ischi en Ligia Grischa!

Perquei, Romania, tes giuvnals
 Uss rimna en roschadas:
 Tarlischan gie tes ideals
 Tras ventgatschun annadas!

Rogaziun federala 1919

La casa svizra stat salvada
 Strembleva gie siu fundament;
 Tempiasta tribla ei vargada
 Cun tun, cametg e berschament:
 Miraculusamein tenida,
 Stat nossa patria protegida.

La casa svizra stat salvada,
 Nos èrs ein buca zappitschai;
 La prad' ei buca maculada
 Cul saung de battagliuns curdai:
 E nos confins, franc sco antruras,
 En pasch ein libers da maluras.

Danunder tala sort, ventira?
 Compatriots, Dieus ha gidau!
 Mitschai da mort, dolur, pupira,
 A Diu cun cor e maun alzau
 Dei laud en num de tut la tiara,
 Tribut de nossa patria cara.

La casa svizra stat salvada,
 La crusch ha dau bien salvament;
 Cun Diu pli ferm che mai ligiada
 Stai, patria, per engraziament!
 Tier Diu en tschiel, o Svizzer, ura,
 Recumandond la sort futura!

Mantegni Dieus la Patria!

1291—1941

Pli fermes il pievel po vegnir,
 Giavisch' el de cun Diu s'unir:
 Il tschiel siu alliau daventa;
 Nos perdavons han quei sentiu,
 Els han il bratsch egl ault stendiu
 Tier Quel che gl' inimitg fugenta.

Egl ault l'egliada lein alzar,
 Las Ligias veglias renovar
 Sco pievel liber, prus, fideivel.
 Confrars, lein star en unitad,
 Sil fundament de caritad
 Sco pievel ferm e cristianeivel.
 Veseivla protecziun ha dau
 Al pievel nies, confederau,
 Il Num dil Segner tutpussent;
 Perquei, confrars, lein dar l'honor
 Al grond Scaffider cun fervur,
 Ludar El cun engraziament!

Als cuolms de mia biala val

Prendend comiau, ni returnond:
 Adina stun jeu admirond
 Vus cuolms en vossa maiestad,
 Da miez unviern, da mesa stad.
 Tiels cuolms de mia biala val
 Jeu mon bugen, sch'el pèz hai mal,
 Cun inaga untgesch' il grev,
 Ves jeu vus, pezzas, sent jeu lev.
 E tucc' ei vus de bandunar,
 Vegnis vus mei a compagnar:
 Amitgs nus stein en vet' e mort,
 Cun vus jeu partel mia sort.

Suenter J. Luzzi.

Al niev uestg Christianus Caminada 1941

Patruna della catedrala,
 Maria, mumma celestia,
 Ti clomas a solemn' intrada
 A Cuera ella baselgiada
 Il niev Pastur, tiu survient,
 Che port' al pievel salvament.

Al successur dils Sogns en Rezia
 Il tschiel concedi la fermezia
 El sogn combat e la prudientscha
 Al defensur de la cardientscha,
 Ch'el meini nus sco um valent,
 Duvrond pil Segner siu talent.

Selegra, pievel, en valladas,
 Retscheiva grazias regaladas,
 Sil Bab en tschiel pli ferm sefida,
 Tras las burasclas Christus gida:
 Sin nies Uestg nus lein tedlar,
 Sin sia vart adina star!

Ils Libers de Lags

Vi eifer il casti
 Arav' in pur in di
 E da sventiras el nuotzun sminava.
 Il castellan denton
 Laghegia giu dal conn
 E ves' ils bos, ch'il pur d'arar duvrava.

«Oreifers tiers de maz
 Quei dat per nies solaz!
 Fumegls, prende dal crieu la buna preda!»
 E gleiti giu els praus
 Arrivan ils schuldaus,
 Il liber pur de quels fa buca fèda.

«Puranchel, seretegn,
 Camond tier tei cheu vegn:
 Quels tgaus ein requiri per segneria!»
 «Quels tgaus ein buca vos,
 Jeu drovel mez mes bos,
 Naven, jeu sun mai staus sut tirania!»

Fumegls van tiel tgamun
 En num dil nausch ladrun
 E vulan trer siedora la stuera:
 Cheu smeina cun raschun
 Il pur siu dir bastun,
 Ch'il lader tgula, fui cun schliata tschera.

Quei ves' il castellan
 E per gl' agricolan
 La sera ei malura arrivada.
 Cheu vegn la garnischun
 E senza remischun
 Tut la famiglia vegn naven menada.

Mo libers sursilvans
 Sedostan dals tirans,
 Agid els cloman ord la vischinonza.
 Ils libers de Fidaz
 Arrivan spert sil plaz
 E spendran la famiglia ord fermonza.

Nos giuvens contan

Ad ault ils cors! Bandieras ein alzadas,
 Per nies confiart sgolatschan tras la val.
 Bandieras cun maletgs dils sogns ornadas
 Fan endament il niebel ideal.

Ad ault ils cors! Il Spert divin envida
 Cun anim ferm sil Segner de sperar;
 El vegn sur nus cun forza benedida,
 Sco sil Sion apostels per formar.

Ad ault ils cors! Nus vein in sogn menader,
 El ei il retg, il pli pussent signur.
 Per nus carstgauns El ei il ferm Salvader
 En tuts combats nies Diu e defensur.

La patria grischuna

Miu car Grischun, ti tiar' alpina,
 Cantond da tei lein raquintar;
 La libertad ha sia tgina
 En tias vals pudiu tschentar.
 A Trun gl'ischi aunc stat e crescha,
 Il pievel tegn lungatg e dun.
 Mintg'onn il cuolm dil matg flurescha,
 Con bials eis ti, miu car Grischun!

Surselva, mia val nativa,
 Jeu hai anflau cheu miu plascher,
 Sin quella spunda sulegliva
 Ventira hai pudiu guder.
 La permavera silla prada
 Jeu hai udiu in legher sun
 E l'acla viu cun flurs ornada,
 Con bials eis ti, miu car Grischun!

Il Rein percuora la vallada
 E conta maiestus choral,
 Salida pezzas en nevada
 E tuts ils vitgs en nossa val.
 Dal Rein la dultscha melodia
 Nus schein udir en la canzun,
 Con cara eis ti, patria mia
 Con bials eis ti, miu car Grischun!

En la patria vi jeu star

Patria nossa sper il Rein,
 Cara eis a mi.
 Tias pézzas loschamein
 Ault sestendan si;
 Alps tarlischan el sulegl
 Cun stupents muletgs,
 Selvas en lur stgir bategl
 Porschan legherments:

En la patria vi jeu star,
 La ventir' ei cheu d'anflar.
 Da miu crest sai contemplar
 Noss' entira val;
 Audel nos uals curdar
 El spimont vial.
 Amureivels vitgs e praus,
 Funs bein cultivai,
 Aclas cun ils biars clavaus:
 A miu cor quei plai!
 En la patria vi jeu star,
 La ventir' ei cheu d'anflar.
 Sun da casa cheu spel Rein,
 Sil sulom patern;
 Vivel ventireivlamein,
 Pasch hai egl intern.
 Dultscha patria, miu tresor,
 Eis miu legherment:
 Rar confiart ti das al cor
 En quest mund present:
 En la patria vi jeu star,
 La ventir' ei cheu d'anflar.

Rogaziun federala 1923

Sur las steilas preparada,
 Stat la patria celestiala;
 L'olma mia ei clamada
 De contonscher beadadad,
 Patria supernaturala,
 Al miu cor niev anim dat.

Il grond plaid dil car Salvader
 Ei la ferma segironza;
 El ei ius sco nies menader
 Ordavon el legherment;
 E siu pievel ha speronza
 Ded anflar siu salvament.

Bial' avdonza empermessa,
 Pleina glisch e pasch cuzzeivla,
 Ord la stgiradetgna spessa
 De quest mund mirein tier tei;
 En la patria ventireivla
 Pren, o Diu, scadin, che crei!

Meina nus per buna via,
 Pelegrins de questa tiara;
 Arv' il liug de la legria
 A nies cor ch'ei stunclentaus;
 Sur las steilas, patria cara,
 Lai guder il sogn ruaus!

La naziun retoromontscha

Naziun retoromana,
 Spel Rein e sper igl Inn,
 Da forza suverana,
 Da niebel origin:
 Eis buca moribunda,
 Sco suffels va tiu flad,
 Ti has vigur profunda,
 Aunc prompta tiel combat.

Naziun retoromana,
 Las Ligias has fundau,
 Cun vusch republican
 Giustia garigiau:
 Eis stada viscla, sauna
 Sper pievels, gronds, vischins,
 Sco frestga flur striauna
 Sur tes uauls alpins.

Naziun retoromana,
 Tgei pos sil mund sperar?
 Che mai daventi vana
 La lutga, sil rempar!

En Rezia stat l'ustonza,
 Tes mats han aunc vigur,
 Canzuns en abundonza,
 Fan aunc a ti honor!

Ventira alla Rezia!

Romontschs en Rezia, selegrei!
 Las combras federalas
 Tarmettan commissiuns, mirei,
 Da Bern ed ord centralas
 Per schar tedlar vies plaid alpin,
 Ch'ei vies portrèt, dagl origin.

Amitgs, vischins, confederai,
 Helvets, vegni en Rezia:
 Cun vus nus essan alliai,
 Gudin tras vus fermezia;
 Nies plaid roman, mo dei adatg,
 Merett' il num de «quart lungatg!»

Si ault els cuolms stat la naziun,
 Ils Rets ein da faviala,
 Che franc mereta l'attenziun,
 Ei gie schi frestg' e biala,
 Gie, nazionala sco nus sez,
 Ded atgna forza en siu pèz..

Confederai, teni cun nus
 Senz' esser sin ballontscha,
 Alzei vos egls tiels cuolms splendidus,
 Schei crescher «la Romontscha».
 Nies stadi svizzer vegn pli cars,
 Tras l'unitad dils quater frars!

Sin pradas alpinas

Leu giu en la bassa brentina fa stgir,
 Mo claras ein pradas alpinas,
 Muntognas stupentas cun lur sclarir
 Sesaulzan sco tontas reginas.
 La mar de tschaghera lai nus en ruaus,
 La glisch digl sulegl fa nies cor tut beaus
 Sin nossas pradas alpinas.

Con gleiti ein passas las flurs dil bi matg,
 Sin l'alp las flurs ein cuzzeivlas,
 Sco crestatgiet sper il ficler retratg,
 Steilalvas sil grugn malmaneivlas!
 Il matg vegn leu si pér il zercladur
 E regia persuerter el cauld fenadur
 Sin nossas pradas alpinas.

Duessen armadas hostilas vegnir
 Per far l'attacc' en tiara nossa,
 Stuess sesalzar e sefar sentir
 Sedefendend tut nossa possa.
 E mass en cadeinas la libertad:
 Sils cuolms ell' anflass franc in liug per trer flad
 Sin nossas pradas alpinas.

Alla Romania radunada a Breil 1930

Fontaunas al pei dil Tumbiv
 Anfleis Vus ded aua sereina,
 Che buglia si ord in' aveina
 Dil proxim glatscher sulegliv;
 Las buolas nutreschan carschun,
 Stgirverd che flurescha leu speras,
 Frestgentan el cauld muntaneras,
 Che passan per spunda e run.

Al pei dil Tumbiv radunai,
 Giuvnals della tiara romontscha,
 Sereins sco quels dutgs sin ballontscha
 Stei per Vossa cuorsa semtgai.
 Sil tschiel, sin igl ault, ideal
 Drizzei, bein attents, Voss' egliada,
 Voss' olma sils cuolms frestgentada
 Retscheivi confiert e vial!

La nuviala legreivla

Car Salvader, per carezia
 Eis tier nus da tschiel vegnius;
 Aunghels contan pleins letezia
 Laud a Ti, ch'eis benedius.
 Ils pasturs giud la nuviala
 Sentan in grond legherment:
 Quella notg schi reha, biala
 Porta glisch e spindrament.

Cara mumma, benedida
 Denter tuttas las dunnauns,
 La Basèlgia tei salida
 Cun legria sin tuts mauns.
 Tiu Bambin a nus ti porschas,
 Quei sogn Fegl dil Bab leusi;
 Nos basegns ti spert encorschas,
 Gidas nus cheu mintga di.

Sogn Giusep, ti bien, fideivel,
 Spel pursepen stas veglionts,
 Lais entrar cun cor migeivel
 Ils pasturs, tuts arrivonts:
 Era nus tier il Salvader
 Meina buntadeivlamein,
 Spel pursepen dil Spindrader
 Stein nus ventireivlamein.

Sontga Teresa de Lisieux

O buna sora Tresa
Flur alva dil Carmel,
Miu egl leu si tei vesa
El bi curtgin dil tschiel.

Ti rimnas rosas bialas
E fieras giu sil mund,
Las olmas immortalas
Tegn car tiu cor profund.

Ti muossas bein la via
Tier Jesus en parvis;
Ils petschens en legria
Suondan tes avis.

Carezia affonila
Per Jesus ard' en tei;
Premura giuvenila
Urbescha er per mei!

La casa paterna

Paterna casa mia
El vitg romontsch alpin,
Vesess jeu cun legria
Puspei leu miu curtgin!
Quei liug de mia tgina
Jeu sai mai emblidar,
Tei mia casa brina
Da cor vi salidar.

Schi luntsch da casa mia
Jeu sundel viagias;
E mo melanconia
Jeu hai, grond malruaus.
La patria carezada
A mi vegn endamen,
Ed èi la stad vargada,
Turnar jeu vi bugen.

Nadal enten l'olma

Jeu astgel bein pronunziar
Tiu num divin, misterius?
A tut il mund vi raquintar,
Co Ti al cor eis grazius:
Per spir carezia sesbassaus,
Cun nus carstgauns Ti eis restaus;
Emmanuel, miu Diu cun mei,
Lai ruassar mei enten Tei!

Salvader, Diu de maiestad,
 Has encuretġ mei cun amur;
 Jeu hai sentiu beadadad
 D'haver anflau in tal pastur.
 Retscheiva miu engraziament
 Per tut salit e spindrament;
 Emmanuel, miu Diu cun mei,
 Lai ruassar mei enten Tei!

Siar' en Tiu bratsch ed en Tiu cor
 Mei pauper viandont sil mund!
 Persuenter vi ludar sonor
 Tiu Num cun sentiment profund.
 Miu Diu! Maneivels eis vegnius,
 Tiu Num ei sogns e benedius;
 Emmanuel, miu Diu cun mei,
 Lai ruassar mei enten Tei!

Igl um fidau

Sco cau de famiglia a Nazaret,
 Giusep, ti um fidau e quiet,
 Bugen luvravas, sperond sin Diu,
 Che ha en siu survetsch tei priu.

Il sogn Messias ti has astgau
 Tener sin bratsch cun bien quitau;
 Sin ses raschienis has dau adatg,
 Tut per carezia tier Diu has fatg.

Nies protectur eis davenportaus,
 Sur la Baselgia eis tschentaus;
 Las olmas ti pertgira bein,
 Sin tiu agid nus sefidein!

Per agurar ventira ad in pèr

Ei dat bia flurs en praus ed orts
 En quei bi temps de primavera:
 Per spus e spusa, buns consorts,
 La cresta — tgiet fa biala tschera:
 Quei matg ded alp jeu vi surdar
 E bia ventira giavischar.

Sco flurs ded alp en sanadad
 Vivi ensemen en legria,
 E varga gie la cuorta stad,
 Salvei vus bein la harmonia,
 Sil Segner car vus sefidei,
 Ils egls encunter tschiel alzei!

Sulegl en tiu cor!

Cul cor en carezia,	Canzuns a ti porschan
Mirond sin tschiel blau,	In niebel confiert,
Setegn cun fermezia	S'anflasses ti era
El suffel stemprau;	Sco en in desiert;
Sulegl emperneivel	Letezia retuorna
El cor lai sclarir,	Cul miedi sonor
Lu portas maneivel	En uras de peinas
Quei ch'ei grev e dir.	Ei aulzan tiu cor.

In cant allegreivel
 Fa bein a scadin,
 E sco in salid
 Amureivel divin,
 Sche mantegn la fidonza
 Cun anim, humor,
 Letezia en l'olma:
 Sulegl en il cor!

Al pur grischun

Dil ventireivel pur grischun
 Ludar lein la clamada!
 Sigl agen tschespet, agen prau
 Stat tia casa, tiu clavau
 Las aclas sper tiu vitg alpin,
 Tes cuolms han en fenada,
 Sin l'atgna cuort ti eis patrun:
 Quei ei tiu bein, o pur grischun!

Dil ventireivel pur grischun
 Ludar lein la clamada!
 Cun faultsch e farcla gida tei
 Massera brava pei a pei;
 La casarina cun inschign
 Guverna la casada
 E dat a ti consolaziun:
 Quei ei tiu bein, o pur grischun!

Dil ventireivel pur grischun
 Ludar lein la clamada!
 Lavur e paun per pigns e gronds,
 Benedicziun dils pardavonts,
 La cuntentientscha en tiu cor,
 Quei ei ventira dada
 Dal Tutpussent en perfecziun:
 Quei ei tiu bein, o pur grischun!

(Musica de Hans Lavater.)

Canzun diis babs

1900

Nus essan babs; tgei vul quei dir?
 Il Bab en tschiel nus semeglein.
 Quei num de bab el mund scaffir
 El ha vuliu schi sabiamein.
 Dad el nus vein paternitad,
 Dad el num, dretg e dignitad!

Nus essan babs, e nos affons
 Ein battigiai al Fegl de Diu.
 La sontga crusch dils perdavons
 Nuidis veis en scola viu. —
 Cun nus, saveies, veis de far,
 Leis vus quell' ierta lavagar!

Nus essan babs, nus cumandain:
 En scola regi il Spert divin!
 Nos fegls a Diu turnar stuein,
 Menar els tier beada fin.
 Il spert dil mund emprovi pér,
 Nus babs stein ferm sil gest e vér!

Nus essan babs; tgei vein pli car,
 Ch'igl agen saung el frestg affon?
 Quei scazi lein nus pertgirar,
 Si' olma preservar da donn:
 Schi ditg sco'l batta aunc nies cor,
 Battin nus babs per quest tresor!

Gronds e pigns

Ils gronds dil mund, perderts e fins
 Schezegian pauc lur pigns vischins;
 Mo nus affons vesein pli clar,
 Nus lein culs gronds buc baratar.

Matella ti, ti mat pignet:
 Sin vus mussein nus grad cun det:
 Ils pigns ein gronds, ils gronds ein pigns:
 Gie nus savein de quels inschins.

En l'apoteca sas mirar
 Tons glas sin crunas tarlischar:
 Ils pigns han en spert ferm e fin,
 Ils gronds mo rauba per mintgin.

E sez il Segner plaida quei:
 Ils petschens schei vegnir tier mei;
 Ils petschens ha el giu bugen,
 Ils gronds el ha schau ir naven.

Bials anials

Tschuncont' onns vegls ein. Vos anials,
 Ed ein restai entirs e bials,
 Restai adina benedi:
 Mirei nus tuts cheu en rudi!

Beadias biaras Vus veseis,
 Sco frestgas flurs en in tschupi:
 Vus ventireivels selegreis
 De tal' honor sin Vies bi di!

Il Segner ha Vus benediu!
 El gidi er' ils descendents!
 Avon la fatscha dil bien Diu
 Lein star, luvrar en tuts moments.

Co igl Evangeli serasa

(Recitaziun de scolars e scolaras cun lur capitani.)

Capitani (buob):

Magister, per il di de Voss' honor
 Vul nossa scola cheu oz raquintar
 Avon il pievel, co igl Evangeli
 Ei serasaus entras ils sogns apostels.
 Mes camerats (tiels scolars), vus essas envidai —
 De far l'entschatta, cun plidar bi clar.

Scolars: Avon che Jesus tuorni tier il Bab —
 El ha plidau sil cuolm de las olivas.
 Mes cars apostels, Mei ed instrui!
 Tuts pievels instrui en la doctrina!

Capitani (semenond viers las scolaras):

Tgi ha il Segner empermess de dar
 Avon che ir a tschiel en gronda gloria?

Scolaras (tuttas):

Siu Spert sontgissim ha el empermess —
E da Tschuncheismas ei quel comparius.
Quei di ei la Baselgia stada cheu. —

Capitani: Sogn Pieder ha plidau da bial' entschatta
Sco il menader enten num de tuts.

Scolars: Sogn Paul avon Damascus seconverta,
Per Christus el davent' in bien gidonter.

Scolaras: Per gudignar il mund pagaun pil Segner
Van ils apostels frestgamein pli lunsch —
Jerusalem va trestamein sutsura,
La religiun de Christus vegn a Roma.

Capitani: Sogn Pieder e sogn Paul ein morts a Roma —
Per la ver Paid, che Christus ei ver Diu.

Scolars: Il Papa ha gl'uffeci de sogn Pieder,
Las clavs de lez el tegn aunc enten maun.

Scolaras: Da Roma vegn tier nus la religiun
Entras ils missionaris curaschus.
Apostels per il bien lein daventar —
Ed ils camonds dil Segner observar.

Tuts, scolars e scolaras:

Lein honorar ils survients de Diu,
Els meinan nus tier Christus, igl Unschiu.

Al tutpussent l'honor lein dar

Armadas steilas en tschiel clar splenduran
Per grond' honor dil Segner Diu.
Siu tron tarlischa, siu plaid tuts aduran:
Fai stém, carstgaun, sil tschiel stelliu!

Tgi tegn en uorden las steilas sin via?
Tgi fa l'aurora tarlischar?
Il grond suleagl sez exclom' en legria:
Al Tutpussent l'honor lein dar!